



AbangAbu Mekanik Wang

Kongsi pengurusan kewangan bersama penuntut UTHM

PROGRAM Kepimpinan Kewangan 2019 (Jelajah Universiti) bersama AbangAbu Mekanik Wang anjuran Pusat Kokurikulum dan Pembangunan Pelajar (PKPP), Universiti Putra Malaysia (UPM) telah mengakhiri siri jelajah kampus bagi zon selatan bertempat di Universiti Tun Hussein Onn Malaysia (UTHM) pada 30 Mac lalu.

Program berlangsung setengah hari yang melibatkan kira-kira 150 penuntut UTHM ini menampilkan Abuayubul Ansari atau lebih dikenali dengan nama AbangAbu Mekanik Wang sebagai penceramah. Satu nama yang tidak asing lagi di dalam dunia pengurusan kewangan, beliau sering memberikan ceramah bermula di Singapura sehingga ke Malaysia, Indonesia, Brunei, Australia, India dan Mesir sehingga melayakkannya menerima beberapa anugerah.

Kampus Uols selaku rakan media turut bersama-sama dalam jelajah universiti



kali ini untuk memperkenalkan portal serta sisipan Kampus Uols kepada warga UTHM.

Jelajah lima universiti

Menerusi program kerjasama Perbadanan Tabung Pendidikan Tinggi Nasional (PTPTN) dan PKPP UPM yang mengelolakan program ini, empat lagi universiti yang telah dijelajah sepanjang Mac 2019 adalah Universiti Sains Malaysia, Universiti Malaysia Sarawak, Universiti Malaysia Sabah, dan Universiti Malaysia Terengganu.

Menyedari masalah pengurusan kewangan dalam golongan generasi muda yang semakin membimbangkan menyebabkan AbangAbu dan PKPP UPM berinisiatif untuk mengadakan program Kepimpinan Kewangan bersama AbangAbu Mekanik Wang.

Menurut Timbalan Pengarah PKPP, Prof Madya Dr. Nur Izura Udzir, program ini mendapat dana daripada PTPTN dan pihak PKPP UPM mengelolakan program bagi siri jelajah pertama ini.

"Pengurusan kewangan yang betul perlu diberi perhatian memandangkan banyak kes melibatkan pembiayaan PTPTN yang tidak dibayar balik, diisyithar muflis dalam usia muda dan cabaran yang perlu graduan lalui untuk bersaing dalam dunia pekerjaan," katanya ketika ditemui dalam sidang media.

"Saya memang amat tertarik dengan program ini kerana ianya telah terbukti, bukan sekadar cakap saja. Contoh terdekat adalah anak lelaki AbangAbu sendiri yang telah dididik sejak usianya sembilan tahun dan kini telah pun berjaya memiliki perniagaan sendiri dalam usia 21 tahun," katanya lagi.

Menerusi slot ini, AbangAbu bukan

sahaja berkongsi panduan bahkan sempat berkongsi pelbagai pengalaman suka dan duka yang memberi inspirasi.

Tekankan prinsip P.H.D

Dalam program ini juga, AbangAbu turut menekankan prinsip awal tentang kepimpinan dan pengurusan kewangan iaitu melalui akronim P.H.D iaitu Passion, Hunger dan Desire. Setiap individu ditekankan untuk memiliki ketiga-tiga elemen penting ini dalam menguruskan kewangan mereka.

Menurut AbangAbu, sebelum ini juga telah diwujudkan kelab The Money Mechanics dengan kerjasama PKPP UPM. Modul ini bakal dibawa ke semua universiti dan hanya terhad kepada 30 hingga 50 orang sahaja setiap IPT.

"Tiga agenda utama kelab ini, pertamanya adalah untuk memastikan penuntut yang tamat pengajian bebas hutang. Kedua, penuntut berjaya menghasilkan minimum RM30,000 dan yang ketiga, penuntut boleh memulakan perniagaan sendiri sekiranya mereka memiliki idea," katanya.

Menurut Ketua Jabatan Sukan dan Kebudayaan Pusat Pengajaran Umum dan Kokurikulum UTHM, Ts. Dr. Norashidah Abd Rahman, program ini sedikit sebanyak membantu penuntut menguruskan kewangan sejak awal sebelum masuk ke dunia kerja.

"Saya percaya Program Kepimpinan Kewangan ini mampu membantu penuntut belajar cara yang betul untuk menguruskan wang. Mereka dapat belajar antara keperluan dan kehendak.

"Apabila pelajar dapat ilmu untuk menguruskan wang mereka sendiri, maka pelajar tak akan rasa terbeban dengan hutang," katanya.



ANTARA teknik pengurusan kewangan yang diajar.



PARA peserta terhibur dengan penyampaian AbangAbu.



SESI sidang media (dari kiri), Dr. Norashidah, AbangAbu dan Dr. Nur Izura.